



Numerò 4

Sem uroses de vos mandar lo quaten numèro del corrièn de l'EOE. Aqueste còp trobaretz d'articles sus l'Escòla Occitana d'Estiu passada, e las activitats que i aguèt alentorn del cinquantenari: gran jòc, balètis e mai. Parlarem tanben dels autres eveniments de l'associacion: la quinzena occitana e la dimenjada dels amics de l'EOE. Bona lectura !

Bilanç de l'EOE 2024

L'ora es al bilanç per aquesta 50ena edicion de l'Escòla Occitana d'Estiu a Vilanèva d'Òlt ont las participacions èran a l'auça !

Aquesta setmana immersiva en occitan prepausa corses de lenga dins 4 dialèctes, talhièrs de cants e danças tradicionals, talhièrs de descobèrta de la cultura occitana e catalana, conferéncias...Tot çò que cal per escambiar e parterjar a l'entorn de la lenga.

E per festejar lo cinquantenari, quelques novetats : un cors de lenga en provençal, de gòts estampilhats, de sacas serigrafiadas... Cadun.a portèt sa pèira per far d'aquesta edicion un vertadièr anniversari. D'ancian.nas de l'EOE nos faguèron onor de lor preséncia amb testimoniatsges de tota mena. Sens doblidar la jornada de fèsta del 15 d'agost amb un grand jòc a l'entorn dels piratas, de taulas redondas per parlar del passat e de l'avenidor, per s'acabar amb un aperitiu e un bal !

Vos disèm a l'an que ven per la 51ena edicion !

Per ne saber mai : <https://eoe-oc.org/language/oc/50-ans-deoe-aquo-se-festa>

**De notar per l'an que ven : l'EOE se debanarà
del 10 al 16 d'agost 2025 !**

Festejar sus l'Isla del Tresaur Interdit, quina aventura !

Los Talhièrs de l'Energia e del Temps, associacion partenari de l'EOE, prepausèt una aventura collectiva per los 200 estagiaris de la cinquantena edicion. Foguèt un moment fòrça interessant, e los piratas de l'EOE nos contan coma son arribats a fargar aqueste jòc gigant dins aqueste article.

Per ne saber mai : <https://eoe-oc.org/language/oc/festejar-sus-lisla-del-tresaur-interdit-quina-aventura>

La Quinzena occitana 2024

La Quinzena occitana 2024 se tenguèt dins mantuna vila e vilatges d'Òut e Garòna del 4 al 20 d'octobre. Festenal a l'entorn de la lenga e la cultura occitanas, co-pensat e co-bastit per 7 associacions del 47 amb lo servici cultura del departament. L'EOE-IEO 47 es una de las associacions del Collectiu Quinzena occitana. Cada annada, una tematica es causida per ligar totas las animacions prepausadas, ongan lo jòc èra metut en avant amb la tematica "jogar". Un fum d'activitats : jornada de jòcs a destinacion dels escolans, mòstra, espectacles musicals, balètis, projeccions documentaris, passejada, jòc de pista per las familhas, forum de jòcs (tradicionals e de societats), estagi de cants, autras animacions escolaras... e de pertot : Pena d'Agénès, La Capèla Bironç, Viraselh, Marmanda, Castèthgelòs, Preishàs, Barbasata, Boèr. Ongan l'EOE-IEO 47 participèt a las jornadas organizadas collectivament,

jornada jòcs a destinacion dels escolans de Pena e Forum jòcs a Boèr. Organizèt lo passatge de 9 classas de l'escòla (bilingüas e non-bilingüas) e 2 classas del collègi de Pena, sus la jornada, sus diferents jòcs XXL, de societat, e lor organizacion. Metèt a disposicion dels dròlles sos jòcs de palets, quilhas e de societat occitans.

Creèt e animèt tanben un jòc de pista a destinacion de las familhas "Dins las piadas occitanas" a Pena d'Agenés ont 8 familhas e un grop de dròlles d'un centre de léser participèron. Animacion plan complimentada, totas las familhas foguèron ganhantas, amb caduna un magnet occitan + una pasta a tartinar al chocolat locala !

La Quinzena s'acabèt a Boèr sus una jornada Forum de jòcs a destinacion de tot public. Mai d'un cinquantenat de jòcs XXL, esportius, de societat... expausats, lo public podí practicar cada jòc, amb per cadun una sensibilizacion a la lenga. Un bon vin 2024 !

Dimenjada dei amics de l'EOE 2025

D'una escòla occitana d'estiu a un altra, cau esperar un an ! Trobatz aquò fòrça? Nautreï finda ! Despí quauqu'annadas, si retrobam en ivèrn per la dimenjada dei amics de l'EOE. Après Tolosa, Montpelhièr, Girona e Pau (per lo carnaval bearnés), avèm causit una altra destinacion per 2025. La dimenjada si debanarà tanben un pauc mai tard dins l'annada, per Pascas (19-21 d'abriu). Mas quala es aquela destinacion?

Se vi parli de Babazok, Palhon ò d'en Castèu, avètz una idèa ? Bessai pas encara.

E se parlem de Catarina Segurana, Rancher, Garibaldi ò d'un grop de música d'ancuei coma Nux Vomica ? Siáu segura que d'unu an capit.

E per lo minjar, sòca, pissaladièra, pan banhat, torta de blea sucrada. Aí, segur qu'avètz endevinat, aquesta annada, anem a Nissa la bèla !

Rampelada : per la dimenjada dei amics de l'EOE, l'associacion prepara un programa d'animacions (visita, luòc per minjar, etc), mas lo lotjament es de la responsabilitat dei participants.

NB: un pauc de vocabulari nissard

Finda = tanben

Bessai = Benleu

Capir = comprene

Aí = òc

Ancuei = uèi

Escambis Occitans de la Davalada

Coma sabetz ja, i a pas agut des Escambis Occitans de la Davalada. Avèm ensajat de los desplaçar a l'ivèrn 2025 mas es pas estat possible. La còla a fach un bèl trabalh de preparacion e de documentacion. Mas es estat malaisit de trobar la disponibilitat per preparar des escambis de mai bèls. Tornarem lançar lo vam al la debuta de l'an que ven pel plaser de nos retrobar, de parlar nòstra lenga e de viure tres jorns en auto-gestion. Quand los EODaires s'amassan, jòia, jòia, jamai s'alassan.

A escotar a l'ostal : los musicians dels 50 ans de l'EOE

Camille en Bal – De còr e d'aiga

Darrièr la polida cobèrta del segond disc de Camille en Bal s'amagan 12 cançons explosivas, plenas d'una energia refrescanta. Tèxtes en occitan, cançons en francés, ritmes cubans... Camille, Maud, Dayron e Onel nos pòrtan dins un balèti-guinguette occitano-cuban que balha enveja d'oblidar tot per virar sus un escotish-salsa tota la nuèit.

Man Encantada – Chivau de Gasconha

Lo grop gascon torna amb un album novèl, agradiu a agachar e a escotar ! Amb de polits arrencaments, lo trio nos portar dins una passejada per de musicas tradicionalas e originalas del sud oèst.
Mencion especiala al branle Adiu Одèca, escrich en seguida d'un viatge dens una Ucraïna en guèrra, e que pòrta tota la doçor e la nostalgia de la dança.



Call to action

Escola Occitana d'Estiu

16 rue de Pujols, 47300, villeneuve

This email was sent to {{contact.EMAIL}}
You've received this email because you've subscribed to our newsletter.

[Se désinscrire](#)

